




Community Living Toronto | Surrey Place Centre | Community Living Wkwemikong Anishinaabek

**TIP SHEET**

# Zhiitaang Wii Shki Kinoomaagaazat Binoojiinh



“Baamaapii ga waabmin n’bapaa”. Aapji gwa maamiikwendaagwat, miinwaa znagendaagwat shki maajii skoonwit binoojiinh. Giizhiitaachgaazat gwa binoojiinh wii skoonwit ga naadmaagna’ aa wii mna nendang binoojiinh maajii skoonwit.

***Shki Kinoomoowin binoojiinh, mii maanda gda binoojiinhim gezhichget***

- Da wenaamdaan waa nankiit miinwaa waa ni-kaazat

- Da wiidookaaza, miinwaa da wiijinakiimaan binoojiinhin
- Da k’kwejmaa wii biiskoonyedizat
- Da shki nkwehkaage, miinwaa shkawii gegoo da nakiitaan
- Da wiidbange epiichi dnaagigoong eknoomaaget
- Da dbaajmaa nendwendang
- Da zhibiige miinwaa da waabmaan yaa-aabi aanin binoojiinhin zhibiigenit
- Da nsidwendaan enkamgadnik
- Da skoonwindaanan tisanan, zhibiganan,

## Zhiitaang Wii Shki Kinoomaagaazat Binoojiinh

---

- gindaaswinan, eshijiiyaagin,
- Da mzinbiige, da mzinwajge, da ngama, miinwaa da bzindaanan ngamwinan,
- Da nakiitooon wiiyow

K'kenjgaadek dash waa nankiit binoojiinh shki kinoomaagaazat, ga wenpanis wii naadmoowat wii zhiitaat wii shki kinoomaagaazat.

- Ga bgidnaa binoojiinh wii wenaamdang nendwendang
- Ga maajiinaa wii wiidwakaazat, wii k'kendang memeshkwat gegwa wii zhichgen.
- Ga kinoomoowaa wii baabiichget biinish wiintam gegwo wii nankiit. Nangwadnang gwa gindaasang naadmaagemgat, maage damnoowin daa ninmoowaa ge mjignan epiichi baabiichget.
- Ga kinoomoowaa ge wiinmadbit mchisak biinish wii maajtan waa nankiin. Ga wiidbamaa gda binoojiinhim mchisak, gda ngamam maage gda gindmoowaa msinigan.
- Ga nakiitaanaa'aa wii naadmaadzat binoojiinh, (dbishkwagoona biiskan biiskoowaagan, mkiznan), biinchiget shkwaa wiisnit, gziibiigninjiit, miinwaa wiigwaamesing wii zhaat.
- Ga gaanjwi'aa binoojiinh wii dbaajmat nendwendang, maage waa zhichget. Mzinchignan gwa daa nikaaznan binoojiinh, maage daa mzin'nige wii waabdoowet nendwendang.
- Ga kinnomoowaa binoojiinh wii d'baajmat nendwendang, maage wiigwaamesing wii azhaat. Giigdoowin, m'zin-nigewin, maage mzinaazganan daa nikaaznan wii d'baajmat nendwendang.

- Damnoonan daa nikaazam wii kinoomoowin binoojiinh wii nabdoonet, jibwaa maajtaat zhibiiget.
- Mzinignan gdaa gindaanan, maage mzi-naazganak gdaa dbaajmaawaak.
- Paamse'ek, maage paamdaabaangoowek, gdaa dbaataanaa'aa ezhgiizhgak, miinwaa ezhi maajiging zaakiichganan, miinwaa mtigwook.
- Gdaa kinoomoowaa binoojiinh wii zhiigoonet, mii maandaa gezhi nsidwendang enaandek miinwaa ezhjii-aak gegoo.
- Gdaa d'baataanaa'aa enaandek, ezhijiaak, gindaaswinak, zhibiiganak etenik gaataa'ing.
- Gdaa naakmatoonaa'aa gegoo, wegwe'iindik gwa etek biindik gdaa nikaaznaa'aa.
- Gdaa kinoomoowaa kitchi jiiitatoon wii nikaazat. B'kwaakwaat gdaa pabgidaanaa'aa, maage gdaa dgishkaanaa'aa, maage gdaa titbijii'ebnaanaa'aa wii nakiitwat jiiitatoon. Damnakaaning gdaa maajiinaa wii damnat, maage gdaa nagmam, bekish gwa gdaa niimin, kina wii nikaazat jiiitatoon.

Egitzingejik gwa mii aapji gechi piitendaagzijik wii kinoomoowaa'at binoojiinh'in. Aabji naadmoowind gwa binoojiinh da mna maajiishkaa skoonwit.

This information has been adapted from the Toronto District School Board and the Toronto Catholic District School Board "Getting Ready for Kindergarten" pamphlet.

